

RELACION

PËR

PROJEKTLIGJIN “PËR DISA NDRYSHIME DHE SHITESA NË LIGJIN NR.43/2015, “PËR SEKTORIN E ENERGJISË ELEKTRIKE”,TË NDRYSHUAR”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Projektligji ka për qëllim miratimin e disa ndryshimeve dhe shtesave në ligjin nr.43/2015, “Për sektorin e energjisë elektrike”, të ndryshuar, të cilat inicohen për realizimin e rekomandimeve të dhëna nga sekretariati i Komunitetit të Energjisë. Këto rekomandime janë reflektuar edhe në vendimin nr.43, datë 15.3.2017, të Entit Rregullator të Energjisë, “Mbi miratimin përfundimtar të certifikimit të Operatorit të Sistemit të Transmetimit të Energjisë Elektrike, OST, sh.a.”, në përputhje me pikën 6, të nenit 54, të ligjit nr.43/2015, “Për sektorin e energjisë elektrike”, të ndryshuar, pas marrjes së opinionit të sekretariatit të Komunitetit të Energjisë.

Qëllimi i këtij projektligji është rishikimi i disa dispozitave të ligjit aktual, të cilat janë konsideruar nga Komuniteti i Energjisë si pengesa në realizimin e plotë të autonomisë së OST-së dhe të ndarjes së OSHEE-së.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Projektligji nuk është i planifikuar në programin e përgjithshëm analitik të projektakteve që do të paraqiten për shqyrtim në Këshillin e Ministrave, gjatë vitit 2019.

III. ARGUMENTIMI I PROJEKTAKTIT, LIDHUR ME PËRPARËSITË, PROBLEMATIKAT, EFEKTET E PRITSHME

Ligji nr.43/2015, “Për sektorin e energjisë elektrike”, i ndryshuar, është përafruar në mënyrë të konsiderueshme (të plotë) me direktivën 2009/72/KE, të Parlamentit dhe Këshillit Evropian, datë 13 korrik 2009, “Mbi rregullat e përbashkëta për tregun e brendshëm të energjisë elektrike”, përfshirë kërkesat e parashikuara për certifikimin e Operatorit të Sistemit të Transmetimit.

Në përfundim të procesit të certifikimit të Operatorit të Sistemit të Transmetimit, Enti Rregullator i Energjisë, me vendimin nr.43, datë 15.3.2017, “Mbi miratimin përfundimtar të certifikimit të Operatorit të Sistemit të Transmetimit të Energjisë Elektrike, OST, sh.a.”, në përputhje me pikën 6, të nenit 54, të ligjit nr.43/2015, “Për sektorin e energjisë elektrike”, të ndryshuar, pas marrjes së opinionit të sekretariatit të Komunitetit të Energjisë, ka vendosur certifikimin e OST, sh.a.-së, me disa kushte.

Njëri prej këtyre kushteve përcakton se:

2. Brenda 12 muajve nga hyrja në fuqi e këtij vendimi, për qëllime të implementimit të parashikimeve të shkronjave “c”, “f”, “l”, dhe “p”, të pikës 2, të nenit 8, të “Rregullores për certifikimin e Operatorit të Sistemit të Transmetimit për energjinë elektrike”, OST, sh.a., të paraqesë në ERE dëshmi që tregon garancinë në lidhje me:

- Bashkëpunimin ndërinstitucional për realizimin e ndryshimeve në kuadrin ligjor dhe transferimin e kompetencave te Ministria e Financave dhe Ekonomisë. Për përmbushjen e këtij detyrimi, OST, sh.a.-ja do t'i paraqesë ERE-s prova dokumentare që ndryshimet ligjore dhe nënligjore të nevojshme, të lidhura me transferimin e kompetencave të Ministrisë së Infrastrukturës dhe Energjisë tek aksionari i OST, sh.a.-së, Ministria e Financave dhe Ekonomisë, kanë ndodhur dhe janë efektive.

Shqipëria ka ratifikuar traktatin e krijimit të Komunitetit të Energjisë dhe është palë kontraktuese e detyruar të ndërmarrë të gjithë hapat për të siguruar përmbushjen e detyrimeve që dalin nga ky traktat, për këtë arsye është tepër e rëndësishme marrja e masave për rregullimet e nevojshme në aktet ligjore dhe nënligjore që rregullojnë sektorin e energjisë elektrike.

Duke marrë në konsideratë faktin se qëllimi kryesor i procesit të traktatit të Komunitetit të Energjisë është përgatitja e sektorit të energjisë të këtij rajoni, për t'u integruar në tregun energjetik të BE-së, nëpërmjet adoptimit dhe zbatimit të *acquis communautaire* në fushën e energjisë, ERE, në vendimin e saj gjykon të nevojshme ndërhyrjet në legjislacionin për sektorin e energjisë elektrike, duke mbajtur parasysh detyrat e lëna në opinionin 1/17, të datës 23 janar 2017, të sekretariatit të Komunitetit të Energjisë, për certifikimin e OST-së, (të cilës i referohet ERE në vendimin e saj), në të cilin thuhet se:

“Të vendosë kërkesa të tjera për kompaninë OST (brenda një afati kohor jo më tepër se 12 muaj) që kanë të bëjnë me:

- të ofrojë të dhëna që Ministria e Infrastrukturës dhe Energjisë nuk mund të propozojë miratimin (ose kundërshtimin) te Këshilli i Ministrave, të interkonektorëve të rinj që do të ndërtohen nga OST-ja, në bazë të legjislacionit përkatës, primar ose sekondar;
- të ofrojë prova që Ministria e Financave dhe Ekonomisë ka autoritetin ekskluziv për të dhënë opinione në ERE për planin e zhvillimit të rrjetit, në bazë të legjislacionit përkatës, primar ose sekondar.”.

Lidhur me këtë opinion vërehet se në nenin 54 të ligjit është përcaktuar se:

- “1.Operatori i Sistemit të Transmetimit ushtron veprimtarinë e tij të ndarë nga aktivitetet e tjera në sektorin e energjisë elektrike, si prodhimi, shpërndarja, tregtimi dhe furnizimi me energji elektrike, në përputhje me parimet dhe kërkesat e përcaktuara në këtë ligj.
2.
3. Duke filluar nga data 1 janar 2016, i njëjti person nuk ka të drejtë që në të njëjtën kohë:
 - a) të ushtrojë kontroll, në mënyrë të drejtpërdrejtë ose të tërthortë, mbi një të licencuar, që kryen ndonjë nga veprimtaritë e prodhimit apo të furnizimit të energjisë elektrike dhe të gazit natyror dhe të ushtrojë kontroll ose ndonjë të drejtë tjetër ndaj Operatorit të Sistemit të Transmetimit ose rrjetit të transmetimit;
 - b) të ushtrojë kontroll, në mënyrë të drejtpërdrejtë ose të tërthortë, mbi Operatorin e Sistemit të Transmetimit ose mbi rrjetin e transmetimit dhe të ushtrojë kontroll ose të ushtrojë ndonjë të drejtë mbi një të licencuar që kryen ndonjë nga veprimtaritë e prodhimit apo të furnizimit të energjisë elektrike dhe të gazit natyror;
 - c) të emërojë anëtarët e këshillit mbikëqyrës, bordit drejtues ose organeve që përfaqësojnë ligjërisht Operatorin e Sistemit të Transmetimit apo rrjetin e transmetimit dhe në mënyrë të drejtpërdrejtë ose të tërthortë, të ushtrojë kontroll apo ndonjë të drejtë mbi një të licencuar që kryen ndonjë nga veprimtaritë e prodhimit apo të furnizimit të energjisë elektrike dhe të gazit natyror;
 - ç) të jetë anëtar i këshillit mbikëqyrës, bordit drejtues ose organeve të tjera që përfaqësojnë të licencuarin pranë të licencuarve që kryejnë veprimtarinë e prodhimit ose furnizimit të energjisë elektrike dhe të gazit natyror dhe veprimtarinë e Operatorit të Sistemit të Transmetimit ose rrjetit të transmetimit.
4. Ndalimet e parashikuara në shkronjat “a”, “b” dhe “c”, të pikës 3, të këtij neni, do të zbatohen në mënyrë të veçantë për:

- a) kompetencën për të ushtruar të drejtën e votës;
 - b) kompetencën për të emëruar anëtarët e këshillit mbikëqyrës, bordit drejtues ose organeve që përfaqësojnë të licencuarin;
 - c) të drejtën e mbajtjes së një pjese të shumicës së aksioneve.
5. Detyrimi i parashikuar në pikën 3, të këtij neni, konsiderohet se është përmbushur nëse dy ose më shumë shoqëri, të cilat kanë rrjetet e tyre të transmetimit, kanë krijuar një sipërmarrje të përbashkët, e cila vepron si një operator i sistemit të transmetimit në dy ose më shumë shtete. Asnjë shoqëri tjetër nuk mund të jetë pjesë e kësaj sipërmarrjeje të përbashkët, përveç rastit kur shoqëria është përcaktuar si operator i pavarur i sistemit të transmetimit dhe është certifikuar sipas kushteve të përcaktuara në këtë ligj.
6. Kur personi i përmendur në pikën 3, të këtij neni, është një organ publik që kontrollohet nga shteti, atëherë dy organe të veçanta publike që ushtrojnë kontroll, njëri mbi Operatorin e Sistemit të Transmetimit ose mbi rrjetin e transmetimit dhe tjetri mbi të licencuarin që kryen funksionin e prodhimit ose të furnizimit të energjisë elektrike, do të konsiderohen sikur nuk janë i njëjti person.

Për përmbushjen e detyrimit të pavarësisë së Operatorit të Sistemit të Transmetimit, nga aktivitetet e prodhimit apo furnizimit, në kuptim të nenit të lartpërmendur, janë miratuar:

- Vendimi nr.317, datë 27.14.2016, i Këshillit të Ministrave, “Për përcaktimin e autoritetit publik që përfaqëson shtetin si pronar të aksioneve të shoqërive të sektorit të energjisë elektrike”, e cila ka përcaktuar, si më poshtë vijon:
 1. Autoriteti publik, që përfaqëson shtetin si pronar të aksioneve të shoqërive Korporata Elektroenergjetike Shqiptare, sh.a. dhe Operatori i Shpërndarjes së Energjisë Elektrike, sh.a., është Ministria e Energjisë dhe Industrisë (aktualisht Ministria e Infrastrukturës dhe Energjisë).
 2. Autoriteti publik, që përfaqëson shtetin si pronar të aksioneve të Operatorit të Sistemit të Transmetimit, sh.a. (OST), është Ministria e Zhvillimit Ekonomik, Turizmit, Tregtisë dhe Sipërmarrjes (aktualisht Ministria e Financave dhe Ekonomisë).
 3. Ministri i Infrastrukturës dhe Energjisë dhe ministri i Financave dhe Ekonomisë emërojnë anëtarët e këshillave mbikëqyrës të shoqërive të përcaktuara në pikat 1 dhe 2, duke zbatuar kufizimet e përcaktuara në ligjin nr.43/2015, “Për sektorin e energjisë elektrike”, të ndryshuar.

- Ligji nr.8/2016, “Për një shtesë dhe ndryshim në ligjin nr.7926, datë 20.4.1995, “Për transformimin e ndërmarrjeve shtetërore në shoqëri tregtare”, të ndryshuar, në nenin 1, të të cilit është përcaktuar se:

“Ushtrimi i së drejtës së përfaqësuesit të pronarit të pronës shtetërore, përfshirë edhe të drejtën e emërimit të anëtarëve të këshillave mbikëqyrës, në shoqëritë elektroenergjetike bëhet në përputhje me përcaktimet e ligjit nr.43/2015, “Për sektorin e energjisë elektrike”, dhe në shoqëritë e gazit natyror bëhet në përputhje me përcaktimet e ligjit nr.102/2015, “Për sektorin e gazit natyror.”.

Pra, nga përcaktimet e përmendura këtu më lart rezulton se secila nga ministritë e përmendura duhet të kryejë funksionin e pronarit të aksioneve në shoqëritë përkatëse. Përpara këtij ndryshimi ishte Ministria e Financave dhe Ekonomisë ajo që ushtronte funksionin e pronarit të aksioneve (autoriteti publik, që përfaqëson shtetin si pronar të aksioneve) në të tria shoqëritë.

Tashmë këto rregullime në bazë të ndryshimeve në aktet e lartpërmendura janë kryer dhe, Ministria e Financave dhe Ekonomisë ushtron kontroll të drejtpërdrejtë në cilësinë e pronarit për OST, sh.a., ndërsa Ministria e Infrastrukturës dhe Energjisë ushtron kontroll të drejtpërdrejtë në cilësinë e pronarit për Korporatën Elektroenergjetike Shqiptare, sh.a. dhe Operatorin e Shpërndarjes së Energjisë Elektrike, sh.a.

Por, nga ana tjetër në ligjin nr.43/2015, “Për sektorin e energjisë elektrike”, të ndryshuar, në nenin 31 është përcaktuar se linjat e reja të interkoneksionit, që ndërtohen nga Operatori i Sistemit të Transmetimit apo nga investitorët privatë, miratohen me vendim të Këshillit të Ministrave, me propozimin e ministrit përgjegjës për energjinë.

Ndërsa në nenin 60 është përcaktuar se:

1. Operatori i Sistemit të Transmetimit harton një plan dhjetëvjeçar të zhvillimit të rrjetit, në konsultim me palët e interesuara dhe e paraqet për miratim në ERE.
8. ERE, në ushtrimin e kompetencave të parashikuara në pikat 1, 6 dhe 7, të këtij neni, duhet të marrë mendimin nga ministri përgjegjës për energjinë.

Pra, sikurse vërehet mbetet ende pa u përmbushur kushti i parashikuar në pikën 2, paragrafi 4, i vendimit të ERE-s nr.43, datë 15.3.2017, që parashikon “Bashkëpunimin ndërinstitucional për realizimin e ndryshimeve në kuadrin ligjor dhe transferimin e kompetencave te Ministria e Financave dhe Ekonomisë. Për përmbushjen e këtij detyrimi, OST sh.a.-ja do t’i paraqesë

ERE-s provat dokumentare se ndryshimet ligjore dhe nënligjore të nevojshme, që lidhen me transferimin e kompetencave të Ministrisë së Infrastrukturës dhe Energjisë tek aksionari i OST, sh.a.-së, Ministria e Financave dhe Ekonomisë, kanë ndodhur dhe janë efektive.”.

Kushti i mësipërm buron edhe nga opinioni i sekretariatit të Komunitetit të Energjisë, që konsideron se ushtrimi i kompetencave të mësipërme nga ministria përgjegjëse për energjinë cenon autonominë e OST-së, si i vetmi entitet përgjegjës për zhvillimin e një sistemi transmetimi të sigurt dhe eficient, pjesë e të cilit janë edhe interkonektorët që janë të domosdoshëm për krijimin e rrjetit të integruar paneuropian, me qëllim mundësimin e tregut të përbashkët të energjisë midis palëve të Komunitetit të Energjisë. Po kështu, edhe plani i investimit 10-vjeçar i parashikuar në nenin 60, të ligjit nr.43/2015, është një nga funksionet themelore të OST-së dhe ndërhyrja e ministrisë përgjegjëse për energjinë gjatë miratimit të tij konsiderohet gjithashtu si cenim i autonomisë së OST-së në ushtrimin e këtij funksioni.

Për sa më sipër, këto dy parashikime duhet të ndryshohen për Operatorin e Sistemit të Transmetimit, në lidhje me miratimet nga ministria përgjegjëse për energjinë, për të përmbushur detyrimin e pavarësisë së tij, sipas nenit 54, dhe për këtë propozohen ndryshimet, si më poshtë:

Nenet e ligjit nr.43/2015, “Për sektorin e energjisë elektrike”, të ndryshuar, në të cilat duhet të ndërhyhet, janë nenet 31 dhe 60, e konkretisht:

Pika 1, e nenit 31, (të ligjit në fuqi)
Ndërtimi i interkonektorëve të rinj (është)

“1. Linjat e reja të interkoneksionit që ndërtohen nga Operatori i Sistemit të Transmetimit apo nga investitorët privatë, miratohen me vendim të Këshillit të Ministrave, me propozimin e ministrit përgjegjës për energjinë.”.

Të bëhet

Pika 1, e nenit 31
Ndërtimi i interkonektorëve të rinj

“1. Linjat e reja të interkoneksionit, që ndërtohen nga investitorët privatë, miratohen me vendim të Këshillit të Ministrave, me propozimin e ministrit përgjegjës për energjinë.”.

Pika 8, e nenit 60, shfuqizohet.

ERE, me vendimet nr.58, datë 15.3.2018, dhe nr.47, datë 19.3.2019, ka vendosur dy herë shtyrjen e afatit në pikën 2, të vendimit nr.43, datë 15.3.2017, “Mbi miratimin përfundimtar të certifikimit të Operatorit të Sistemit të Transmetimit të Energjisë Elektrike, OST, sh.a.”, në përputhje me pikën 6, të nenit 54, të ligjit nr.43/2015, “Për sektorin e energjisë elektrike”, të ndryshuar, pas marrjes së opinionit të sekretariatit të Komunitetit të Energjisë”, deri në datën 15.12.2019.

Vlen të theksohet se mospërmbushja e këtyre detyrimeve nga OST-ja, deri në datën 15.12.2019, referuar paragrafit 3, të vendimit të certifikimit, sjell si pasojë rihapjen e procedurës së certifikimit në përputhje me nenin 14, të “Rregullave për certifikimin e Operatorit të Sistemit të Transmetimit të Energjisë Elektrike”, sikurse theksohet edhe nga sekretariati i Komunitetit të Energjisë.

Heqja e certifikimit apo rihapja e procedurës së certifikimit do të sillte pasoja për OST-në dhe do të rrezikonte dhe pozicionin e saj si anëtare me të drejta të plota në ENTSO-E.

Gjithashtu, duke marrë shkas nga kjo iniciativë ligjore që do të ndërmerret, si dhe nisur nga praktikat e deritanishme të ndjekura për lidhjet e reja dhe nga eksperiencia e shteteve të ndryshme në rajon dhe atyre evropiane, të tilla si Serbi, Itali, Francë etj., parashikimet në legjislacionet e tyre përkatëse sugjerohet që të merret në konsideratë edhe ky ndryshim:

- Në nenin 28, fjalia e parë dhe e dytë e pikës 5 dhe pika 7 shfuqizohen.

Transpozimi dhe zbatimi i ndarjes funksionale e ligjore të Operatorit Kombëtar të Sistemit të Shpërndarjes së Energjisë Elektrike është një detyrim për Shqipërinë nën paketën e tretë të tregut të brendshëm të energjisë.

Sekretariati i Komunitetit të Energjisë, në opinionin e tij, konsideron se:

- Direktiva 2009/72/EC, në bashkëpunim me vendimin e Këshillit Ministror 2011/02/MC-EnC, detyron palët kontraktuese, përfshirë Shqipërinë, të transferojnë *de jure* në legjislacionin kombëtar, si dhe të zbatojnë *de facto* kërkesën e funksionimit dhe të ndarjeve ligjore të operatorëve kombëtarë të sistemit të shpërndarjes së energjisë elektrike, përfshirë krijimin e një programi pajtueshmërie dhe zyrtari për pajtueshmëri.
- Më konkretisht, neni 72, i ligjit nr.43/2015, “Për sektorin e energjisë elektrike”, të ndryshuar, përcakton ndarjen e Operatorit Kombëtar të Shpërndarjes së Energjisë Elektrike dhe përcakton një afat kohor për realizimin e këtij procesi.

- Ligji nr.43/2015, “Për sektorin e energjisë elektrike”, të ndryshuar, megjithatë, nuk arrin të realizojë plotësisht të drejtat efektive të vendimmarrjes së operatorit të sistemit të shpërndarjes të pavarur nga ndërmarrja e integruar e energjisë elektrike, emërimin e një zyrtari të pajtueshmërisë dhe miratimin e një programi pajtueshmërie.
- Përveç ndarjes legale, direktiva 2009/72/EC, kërkon një numër elementesh që lidhen me pavarësinë funksionale të menaxhimit, të drejtat efektive të vendimmarrjes të njësisë ekonomike përgjegjëse për aktivitetet e shpërndarjes, krijimin e një zyrtari dhe programi pajtueshmërie, disponueshmëria e burimeve të nevojshme (përfshirë burimet njerëzore, teknike, fizike dhe financiare) për të qenë në dispozicion të operatorit të sistemit të shpërndarjes për të përmbushur detyrat e tij dhe një ndarje e qartë të markës dhe komunikimit të aktiviteteve të shpërndarjes nga ato të furnizimit.

Bazuar në mendimin e sekretariatit të Komunitetit të Energjisë, Ministria e Infrastrukturës dhe Energjisë ka iniciuar ndryshimin e nenit 72, të ligjit nr.43/2015, “Për sektorin e energjisë elektrike”, të ndryshuar, dhe për këtë propozohen ndryshimet, si më poshtë vijon:

Shkronjat “a” dhe “b”, të pikës 3, të nenit 72, ndryshohen, si më poshtë vijon:

- “a) Të ketë të drejta të plota vendimmarrëse, të pavarura nga shoqëria e integruar e energjisë elektrike, lidhur me asetet e nevojshme për funksionimin, mirëmbajtjen ose zhvillimin e rrjetit të shpërndarjes.

Për të përmbushur këto detyra, operatori i sistemit të shpërndarjes duhet të ketë në dispozicion burimet e nevojshme, përfshirë burimet njerëzore, teknike, fizike dhe financiare.

Shoqëria mëmë (kontrolluese) ka të drejtën e mbikëqyrjes ekonomike dhe menaxheriale, në lidhje me kthimin e aktiveve, miratimin e planit ekonomik financiar ose çdo instrument tjetër të barasvlershëm të operatorit të sistemit të shpërndarjes dhe të vendosë kufijtë e përgjithshëm në nivelet e borxhit të shoqërisë bijë (të kontrolluar).

Shoqëria mëmë (kontrolluese) nuk mund të japë udhëzime për veprimtarinë e përditshme operacionale të Operatorit të Sistemit të Shpërndarjes së Energjisë dhe nuk ka të drejtë të marrë vendime lidhur me ndërtimin apo rikonstruksionin e linjave të shpërndarjes, vlera e investimit e të cilave nuk tejkalon nivelet e planeve financiare të miratuara apo vlerat e përcaktuara në statutin e shoqërisë, apo legjislacionin në fuqi;

- b) Të hartojë një program pajtueshmërie që përcakton masat që do të merren për të siguruar ndalimin e veprimeve diskriminuese, si dhe të sigurojë që respektimi i programit të monitorohet në mënyrën e duhur. Programi i pajtueshmërisë përcakton detyrimet specifike të punonjësve për përmbushjen e këtij objekti.

Personi ose organi përgjegjës për monitorimin e programit të pajtueshmërisë (zyrtari i pajtueshmërisë së operatorit të sistemit të shpërndarjes), paraqet çdo vit në ERE, një raport vjetor, i cili përcakton masat e marra në kuadër të programit të pajtueshmërisë. Ky raport publikohet në faqen zyrtare të ERE-s.

Zyrtari i pajtueshmërisë së operatorit të sistemit të shpërndarjes është plotësisht i pavarur dhe ka akses në të gjitha informacionet e nevojshme të operatorit të sistemit të shpërndarjes dhe çdo shoqërie të lidhur, për të përmbushur detyrën e tij.”.

Gjithashtu, ky ndryshim ligjor sjell konceptin e zyrtarit të pajtueshmërisë të Operatorit të Sistemit të Shpërndarjes, si një organ plotësisht i pavarur dhe që ka qasje në të gjitha informacionet e nevojshme të Operatorit të Sistemit të Shpërndarjes, për të përmbushur detyrën e tij.

Ministria e Infrastrukturës dhe Energjisë ka kërkuar mendimin e sekretariatit të Komunitetit të Energjisë për ndryshimin e shkronjave “a” dhe “b”, të pikës 8, të nenit 72, të ligjit nr.43/2015, “Për sektorin e energjisë elektrike”, të ndryshuar, dhe është në pritje të opinionit.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektligji është bazuar në nenet 78, pika 1, dhe 83, të Kushtetutës. Projektligji i propozuar është në harmoni me Kushtetutën.

V. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKTET NORMATIVE)

Ky projektligj nuk synon përafrimin e ndonjë *acquis* të BE-së.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Ky projektligj parashikon disa ndryshime dhe shtesa në dispozitat e ligjit nr.43/2015, “Për sektorin e energjisë elektrike”, të ndryshuar, si më poshtë vijon:

Neni 1 përcakton se fjalia e dytë, e pikës 4, të nenit 17, shfuqizohet.

Neni 2 përcakton se fjalia e parë dhe e dytë e pikës 5 si dhe pika 7, e nenit 28, shfuqizohen.

Neni 3 përcakton se pika 1, e nenit 31, ndryshohet, si më poshtë:

“1. Linjat e reja të interkoneksionit, që ndërtohen nga investitorët privatë, miratohen me vendim të Këshillit të Ministrave, me propozimin e ministrit përgjegjës për energjinë.”.

Neni 4 përcakton se në pikën 2, të nenit 49, pas shkronjës “h” shtohet shkronja “i”, me këtë përmbajtje:

“i) zhvillimin e procesit konkurrues për miratimin e ndërtimit të kapaciteteve prodhuese të energjisë nga hidrocentralet.”.

Neni 5 përcakton se pika 8, e nenit 60, shfuqizohet.

Neni 6 përcakton se në nenin 72 bëhen ndryshimet e mëposhtme:

Shkronjat “a” dhe “b”, të pikës 3, të nenit 72, ndryshohen, si më poshtë vijon:

“a) Të ketë të drejta të plota vendimmarrëse, të pavarura nga shoqëria e integruar e energjisë elektrike, lidhur me asetet e nevojshme për funksionimin, mirëmbajtjen ose zhvillimin e rrjetit të shpërndarjes.

Për të përmbushur këto detyra, operatori i sistemit të shpërndarjes duhet të ketë në dispozicion burimet e nevojshme, përfshirë burimet njerëzore, teknike, fizike dhe financiare.

Shoqëria mëmë (kontrolluese) ka të drejtën e mbikëqyrjes ekonomike dhe menaxheriale, në lidhje me kthimin e aktiveve, miratimin e planit ekonomik financiar ose çdo instrument tjetër të barasvlershëm të operatorit të sistemit të shpërndarjes dhe të vendosë kufijtë e përgjithshëm në nivelet e borxhit të shoqërisë bijë (të kontrolluar).

Shoqëria mëmë (kontrolluese) nuk mund të japë udhëzime për veprimtarinë e përditshme operationale të Operatorit të Sistemit të

Shpërndarjes së Energjisë dhe nuk ka të drejtë të marrë vendime lidhur me ndërtimin apo rikonstruksionin e linjave të shpërndarjes, vlera e investimit e të cilave nuk tejkalon nivelet e planeve financiare të miratuara apo vlerat e përcaktuara në statutin e shoqërisë apo legjislacionin në fuqi;

- b) Të hartojë një program pajtueshmërie që përcakton masat që do të merren për të siguruar ndalimin e veprimeve diskriminuese, si dhe të sigurojë që respektimi i programit të monitorohet në mënyrën e duhur. Programi i pajtueshmërisë përcakton detyrimet specifike të punonjësve për përmbushjen e këtij objekti.

Personi ose organi përgjegjës për monitorimin e programit të pajtueshmërisë (zyrtari i pajtueshmërisë së operatorit të sistemit të shpërndarjes) paraqet çdo vit në ERE një raport vjetor, i cili përcakton masat e marra në kuadër të programit të pajtueshmërisë. Ky raport publikohet në faqen zyrtare të ERE-s.

Zyrtari i pajtueshmërisë së operatorit të sistemit të shpërndarjes është plotësisht i pavarur dhe ka akses në të gjitha informacionet e nevojshme të operatorit të sistemit të shpërndarjes dhe çdo shoqërie të lidhur, për të përmbushur detyrën e tij.”.

Neni 7 përcakton se parashikimi i nenit 4, të këtij ligji, nuk zbatohet për subjektet që janë pajisur me “Miratim paraprak”, në përputhje me legjislacionin në fuqi.

Neni 8 përcakton se ky ligj hyn në fuqi 15 ditë pas botimit në “Fletoren zyrtare”.

VII. INSTITUCIONET DHE ORGANET QË NGARKOHEN PËR ZBATIMIN E PROJEKTAKTIT

Ngarkohet Ministria e Infrastrukturës dhe Energjisë për marrjen e masave për zbatimin e këtij projektligji.

VIII. MINISTRITË, INSTITUCIONET DHE SUBJEKTET E TJERA QË KANË KONTRIBUAR NË HARTIMIN E PROJEKTAKTIT

Projektligji është hartuar nga strukturat teknike në Ministrinë e Infrastrukturës dhe Energjisë.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Ky projektligj nuk ka efekte financiare të drejtpërdrejta për buxhetin e shtetit.

KËSHILLI I MINISTRAVE